

## Davlat-Xususiy Sheriklik Asosida Jamoat Xavfsizligini Ta'minlash Bilan Bog'liq Sud Amaliyotining Tahlili

Saidov Sharofiddin Abdug'aniyevich

O'zbekiston respublikasi Jamoat xavfsizligi universiteti mustaqil izlanuvchisi

**Annotatsiya:** Maqolada davlat-xususiy sheriklik (DXSh) asosida jamoat xavfsizligini ta'minlash bilan bog'liq sud amaliyoti tahlil qilinadi. Ushbu ishda davlat organlari va xususiy sektor o'rtasidagi hamkorlikning asosiy huquqiy jihatlari ko'rib chiqilib, jamoat xavfsizligi sohasida DXSh loyihalarini amalga oshirish jarayonida yuzaga keladigan muammolar yoritib beriladi. Maqolada, shuningdek, normativ-huquqiy tartibga solish masalalari, sud nizolarini hal etish amaliyoti va DXSh loyihalarida ishtirok etuvchi tomonlarning huquqlarini himoya qilishda sudlarning o'rniga alohida e'tibor qaratiladi. Jamoat xavfsizligini ta'minlashda davlat-xususiy sheriklikni samaraliroq joriy etish uchun sud amaliyoti va qonunchilikni takomillashtirish bo'yicha takliflar ham taqdim etilgan.

**Kalit so'zlar:** davlat-xususiy sheriklik, jamoat xavfsizligi, sud amaliyoti, huquqiy tartibga solish, hamkorlik.

O'zbekiston bugun o'zining uzoqni ko'zlagan siyosati bilan nafaqat mintaqada balki jahonda siyosiy jarayonlarning faol ishtirokchisiga aylandi desak hech mubolag'a bo'lmaydi. Xususan, o'tgan qisqa muddat ichida mamlakat Birlashgan Millatlar Tashkiloti, Parlamentlararo Ittifoq, Yevropa Ittifoqi, Yevropada xavfsizlik va hamkorlik tashkiloti, Shanxay hamkorlik tashkiloti, Mustaqil Davlatlar Hamdo'stligi, Islom hamkorlik tashkiloti kabi xalqaro va mintaqaviy tashkilotlar bilan o'zining halqaro hamkorligini o'rnatib, davlatni yangi Uyg'onish davri, ya'ni Uchinchi Rennansans bosqichiga o'tdi desak adashmagan bo'lamiz.

Yangi O'zbekistonda shu kabi islohotlarni izchil davom ettirish maqsadida qator sohalarda tub islohotlar amalga oshirilayotgani hech kimga sir emas. Xususan, aholining tinchligi va farovonligini ta'minlash, jamoat tartibini saqlash maqsadida davlat qator sohalardagi o'z faoliyatini amalga oshirish uchun xususiy sektorlarni ham jalb etish chora-tadbirlarini amalga oshirmoqda. Xususan, Sh.M.Mirziyoev tashabbusi bilan 2020 yil 7 dekabrda "Davlat tomonidan tartibga solinadigan sohalarga xususiy sektorni jalb etish bo'yicha qo'shimcha chora-tadbirlar to'g'risida"gi PQ - 4913-son qarori qabul qilindi. Mazkur qaror asosida "Davlat funksiyalari – biznes uchun imkoniyat" loyihasi doirasida davlat tomonidan tartibga solinadigan "Normativ huquqiy va metodologik bazani shakllantirish", "davlat organlari funksiyalarini xususiy sektorga o'tkazish kompleks mexanizmini joriy etishning tashkiliy chora-tadbirlari" va "xususiy sektor tomonidan davlat funksiyalarini amalga oshirish samaradorligini oshirish" kabi yo'nalishlarga xususiy sektorni jalb etish bo'yicha "Yo'l xaritasi" ishlab chiqildi. Mazkur yo'nalishlar o'z navbatida quyidagi sohalarni qamrab oldi. Jumladan:

**a) normativ-huquqiy va metodologik bazani shakllantirish yo'nalishi bo'yicha** – "Tadbirkorlik faoliyati erkinligining kafolatlari to'g'risida"gi, "Tadbirkorlik va professional faoliyat subyektlarini o'z-o'zini tartibga solish to'g'risida"gi Qonunlar, shuningdek, "Davlat funksiyalarini xususiy sektorga o'tkazish tartibi to'g'risida"gi hamda "Elektron kuzatuv maskanlari to'g'risida"gi Vazirlar Mahkamasi Qarorlari shular jumlasidandir;

**b) davlat organlari funksiyalarini xususiy sektorga o'tkazish kompleks mexanizmini joriy etish yo'nalishi bo'yicha** – kadastr ishlarini bajarish, yo'l harakati xavfsizligini ta'minlash

hamda transport vositalarining xavfsiz harakatlanishini ta'minlash; milliy haydovchilik guvohnomasini berish; davlat xizmatlarini ko'rsatish va ichki ma'muriy-xo'jalik faoliyatini ta'minlash kabi sohalarda;

**v) xususiy sektor tomonidan davlat funksiyalarini amalga oshirish samaradorligini oshirish yo'nalishi bo'yicha** – xususiy sektorlarda elektron maydoncha yaratish. Bundan tashqari, vazirlik va idoralar kesimida xususiy sektorga o'tkazilishi mumkin bo'lgan davlat funksiyalarini tahlil etish mexanizmlarini yo'lga qo'yishga qaratilgan davlat funksiyalarining **yagona reestrini** yuritish shular jumlasidandir.

Shu o'rinda, Yangi O'zbekistonda davlat organlarining funksiyalarini xususiy sektorga o'tkazishning o'ziga xos jihatlari, mamlakat aholisi va halqaro ekspertlarning bugungi kundagi siyosiy o'zgarishlarga bo'lgan munosabatlarini ilmiy o'rganish orqali "Obod va xavfsiz mahalla", "Sog'lom oila – sog'lom jamiyat", "Aqlli shahar" va "Xavfsiz shahar" g'oya va tamoyillarga asoslangan ilmiy asoslangan takliflarni ishlab chiqish mazkur tadqiqot ishining maqsadi hisoblanadi.

Davlat-xususiy sheriklikning o'ziga xos jihatlari to'g'risida qator xorijlik huquqshunos olimlar o'z ilmiy asarlarida fikr va muloxazalar bildirishgan. Jumladan, rusmiyalik huquqshunos olimlar V.Varnavskiy<sup>1</sup>, G.A. Borщевskiy<sup>2</sup>, Ye. A. Popov, S. K. Abramyan va A. V. Agafonov<sup>3</sup> va E.R. Yeskomb<sup>4</sup>larning fikricha davlat-xususiy sheriklikning o'ziga xos jihatlardan biri davlat o'ziga tegishli bo'lgan biron-bir vazifani yozma shartnoma asosida iqtisodiy salohiyati yuqori bo'lgan yuridik tashkilot (tadbirkor)ga ortirilgan daromadga teng sherik bo'lish asos hamda uni faoliyatini davlat tomonidan tizimli nazorat qilish asosida berishdir.

Mazkur tushunchalardan bilish mumkinki, har bir davlatning rivojlanganlik darajasini aniqlash jarayonida ijtimoiy omillardan ko'ra ko'proq aniq iqtisodiy mezonlar hisobga olinishi borasidagi qarashlar ustunlik qiladi. Bunday mezonlardan biri aholi jon boshiga to'g'ri keladigan daromaddir. Bugungi kunda aholi jon boshiga to'g'ri keladigan yalpi ichki mahsuloti yuqori bo'lgan mamlakatlar rivojlangan mamlakatlar sifatida qabul qilinadi. Yana bir iqtisodiy mezon bu – sanoatlashuvdir. Alohida taakidlash joizki so'nggi yillarda barcha rivojlangan davlatlar iqtisodiyotida sanoatning uchinchi hamda to'rtinchi tarmoqlari hukmron bo'lgan mamlakatlar odatda rivojlangan mamlakatlar sifatida qabul qilinadi. Yaqin vaqtlardan boshlab yana bir ko'rsatkich, ya'ni iqtisodiy ko'rsatkichlar, milliy daromad va boshqa ko'rsatkichlar, shuningdek, o'rtacha umr ko'rish va ta'lim tizimi holatini umumlashtirgan Inson taraqqiyoti indeksi darajasi ham keng qo'llanila boshlandi. Bu mezon rivojlangan mamlakatlarni juda yuqori reytingga ega davlatlar sifatida belgilanadi.

Shu o'rinda, bugungi kunda dunyo mamlakatlari orasidagi qaysi davlatlarda davlat-xususiy sheriklik asosidagi munosabatlarni tartibga soluvchi normalar qabul qilgan? Qaysi mamlakatlar esa rad etgan? degan o'rinli savol yuzaga keladi. Olib borilgan ilmiy izlanishlar davrida rivojlangan davlatlardan **Buyuk Britaniya, Avstraliya, Kanada, Shvesiya va Irlandiya** kabi davlatlar birinchilardan bo'lib, davlat-xususiy sheriklik asosidagi munosabatlarni tartibga soluvchi normalarni o'z jamiyat hayotiga singdirgan bo'lsa, keyingi bosqichda esa **Fransiya, Germaniya,**

<sup>1</sup>Варнавский, В. Государственно-частное партнерство: некоторые вопросы теории и практики / В. Варнавский. – Текст : электронный // Мировая экономика и международные отношения. – 2011. – № 9. – С. 41 – 50.

<sup>2</sup>Борщевский, Г. А. Государственно-частное партнерство : учебник и практикум для СПО / Г. А. Борщевский. – Litres, 2021. – 282 с. – Текст : электронный

<sup>3</sup>Попов, Е. А. Государственно-частное партнерство как объект правового регулирования / Е. А. Попов, С. К. Абрамян, А. В. Агафонов. – Текст : электронный // Гуманитарные, социально-экономические и общественные науки. – 2018. – №. 1. – URL: <https://cyberleninka.ru/article/n/gosu-darstvenno-chastnoe-partnerstvo-kak-obekt-pravovogo-regulirovaniya/viewer>

<sup>4</sup>Государственно-частное партнерство: Основные принципы финансирования / Э. Р. Йескомб Пер. с англ. — М. : Альпина Паблишер, 2019. — 457 с. – URL: // [https://www.rulit.me/data/programs/resources/pdf/Yeskomb\\_Gosudarstvenno-chastnoe-partnerstvo\\_RuLit\\_Me\\_591167.pdf](https://www.rulit.me/data/programs/resources/pdf/Yeskomb_Gosudarstvenno-chastnoe-partnerstvo_RuLit_Me_591167.pdf). – Текст : электронный.

**Ispaniya, Janubiy Koreya, Rossiya Federatsiyasi hamda Qazag‘iston Respublikasi** kabi davlatlarining normativ-huquqiy bazalarida o‘z aksini topgan.

Mazkur davlatlardan, **Avstraliya, Germaniya, Buyuk Britaniya, Kanada, Ispaniya va Janubiy Koreya** davlatlarida aynan davlat-xususiy sheriklikning quyidagi loyixalari amaliyotda o‘zining yuqori natijasini ko‘rsatgan. Xususan, **Avstraliyada** “Avtomobil yo‘llari, temir yo‘llar, aloqa vositalari”<sup>5</sup> loyihalari, **Germaniyada** “Ta‘lim muassasalari, huquqni muhofaza qilish, axborot-kommunikatsiya texnologiyalari”<sup>6</sup> sahalarida, **Buyuk Britaniyada** “Transport sektori, sog‘liqni saqlash, ta‘lim obyektlari”, shuningdek, “Yashil iqtisodiyot”<sup>7</sup> sohalarida, **Kanadada** “Sog‘liqni saqlash, transport, suv ta‘minoti, energetika, sanoat chiqindilarini yo‘q qilish inshootlari”<sup>8</sup> sohalarida, **Ispaniyada** “Transport”<sup>9</sup> sohasida hamda **Janubiy Koreyada** esa “Transport inshootlari, maktablar, harbiy obyektlar, chiqindilarni qayta ishlash inshootlari”<sup>10</sup> kabi sohalarida qabul qilingan loyihalar amaliyotda juda davlat ravnaqi uchun o‘z xissasini qo‘shgan.

Bundan tashqari iqtisodiy salohiyati yuqori bo‘lgan **Rossiya Federatsiyasining** tajribasida esa budjetdan tashqari mablag‘larni jalb qilish usullari orqali davlat-xususiy sheriklik faoliyatini rivojlantirishga qaratilgan qator normalar qabul qilingan. Xususan, Federalnyy zakon № 44-FZ «O kontraktnoy sisteme v sfere zakupok tovarov, rabot, uslug...»<sup>11</sup>, Federalnyy zakon № 223-FZ «O zakupkax tovarov, rabot, uslug otdelnyimi vidami yuridicheskix lis» i polojeniya o zakupkax sootvetstvuyushix yuridicheskix lis, Federalnyy zakon № 115-FZ «O konsessionnyx soglasheniyax», Federalnyy zakon № 224-FZ «O gosudarstvenno-chastnom partnerstve, munitsipalno-chastnom partnerstve...»<sup>11</sup> kabilar shular jumlasidandir.

Yuqorida bayon etilgan rivojlangan davlatlarning ijobiy tajribasidan kelib chiqib, bugungi kunda yangi O‘zbekistonda xususiy sektorlarni davlat organlari faoliyatiga jalb qilish holati qanday?, Davlat-xususiy sheriklik faoliyati bilan bog‘liq muammoli holatlar va ularni keltirib chiqaruvchi sabab va omillar nimalardan iborat? degan savol yuzaga keladi.

Bugungi kunda yangi O‘zbekistonda mamlakat ravnaqi uchun xususiy davlat sektorlarini keng jalb etish maqsadida O‘zbekiston Respublikasining “Davlat-xususiy sheriklik to‘g‘risida”gi Qonuni va 2020 yil 7 dekabrda “Davlat tomonidan tartibga solinadigan sohalariga xususiy sektorni jalb etish bo‘yicha qo‘shimcha chora-tadbirlar to‘g‘risida”gi PQ – 4913-son qarori asosida shu kunga qadar mamlakatda jami 41 turdagi<sup>12</sup> qonun va qonunosti hujjatlari qabul qilingan. Shundan, 1 ta qonun, 18 ta O‘zbekiston Respublikasi Prezidentining Qarorlari va 22 ta Vazirlar Mahkamasi Qarorlari shular jumlasidandir. Mazkur normalar sohalar kesimida tahlil qilinganda qabul qilingan normalarning **eng yuqori ko‘rsatkichi** maktabgacha ta‘lim, davlat-xususiy sheriklik asosida qonunchilik milliy bazasini takomillashtirish va ko‘chmas obyektlarni qurilishi bilan bog‘liq sohalarini qamrab olgan bo‘lsa, **eng past ko‘rsatkich** esa ilmiy tadqiqot ishlarini olib borish va suv ta‘minoti bilan bog‘liq sohalariga to‘g‘ri kelmoqda.

<sup>5</sup>Шаповалова Н. В. Государственно-частное партнерство: зарубежный опыт / Н. В. Шаповалова, Н. В. Королева // Проблемы управления рыночной экономикой : межрегиональный сборник научных трудов. — Томск : Изд-во ТПУ. — 2014. — Ч. 1. — С. 119-122. — Текст : непосредственный.

<sup>6</sup>Ўша манбаа: - С 124.

<sup>7</sup>Фадюшин, И. С. Международный опыт развития ГЧП / И. С. Фадюшин. – DOI: 10.23670/IRj.2019.82.4.035 // Международный научно-исследовательский журнал. – 2019. – № 4 (82). – С. 39–43. – Текст : непосредственный.

<sup>8</sup>Ўша манбаа: - С 44.

<sup>9</sup>Ўша манбаа: - С 44.

<sup>10</sup>Взаимодействие государства и бизнеса: учебное пособие / Л. А. Добрынин, Марковская Е. И., Медведь А. А., Привалов Н. Г., Рагимова Н. С., Троицкая И. В. – СПб: Издательство СПбГЭУ, 2014. – 192 с. – Текст : непосредственный.

<sup>11</sup>[https://invest.nso.ru/sites/invest.nso.ru/wodby\\_files/files/federalnyy\\_zakon\\_ot\\_13.07.2015\\_no\\_224-fz\\_red\\_10.07.2023\\_o\\_gosudarstvenno-chastnom\\_partnerstve\\_municipalno-chastnom\\_partnerstve\\_v\\_rossiyskoy\\_federacii\\_i\\_vnesenii\\_izmeneniy\\_v\\_otdelnye\\_zakonodatelnye\\_akti\\_rossiysk.pdf](https://invest.nso.ru/sites/invest.nso.ru/wodby_files/files/federalnyy_zakon_ot_13.07.2015_no_224-fz_red_10.07.2023_o_gosudarstvenno-chastnom_partnerstve_municipalno-chastnom_partnerstve_v_rossiyskoy_federacii_i_vnesenii_izmeneniy_v_otdelnye_zakonodatelnye_akti_rossiysk.pdf)

<sup>12</sup>Ўзбекистон Республикаси миллий қонунчилик базаси // lex.uz

Shu o'rinda, bugungi kunda, yangi O'zbekistonda davlat-xususiy sheriklik asosida faoliyat yuritayotgan qaysi turdagi sohalarga nisbatan fuqarolarning e'tirozlari ortmoqda? degan o'rinli savol yuzaga kelishi tayin. Olib borilgan ilmiy tadqiqot natijalari shuningdek, ommaviy axborot vositalari yoritilgan dayjestlarni tahlillaridan bilish mumkinki, bugungi kunda O'zbekiston Respublikasi Vazirlar Mahkamasining "2018 — 2022 yillarda O'zbekiston Respublikasida yo'l harakati xavfsizligini ta'minlash konsepsiyasini amalga oshirish bo'yicha qo'shimcha chora-tadbirlar haqida"gi Yo'l harakati xavfsizligini ta'minlash tizimini yanada takomillashtirish chora-tadbirlari to'g'risidagi Qaror bilan tasdiqlangan "Yo'l harakati xavfsizligini ta'minlash va zamonaviy yo'l infratuzilmasini tashkil etish sohasida davlat-xususiy sheriklikni amalga oshirish tartibi to'g'risida"gi vaqtinchalik Nizom<sup>13</sup>da belgilangan yo'l harakati faoliyatini monitoringi va intellektual videokameralarning integratsiyalashgan tizimlarini joriy etish shuningdek, mamlakatda zamonaviy yo'l infratuzilmasini tashkil etish bo'yicha loyihalar doirasida xususiy investitsiyalarni jalb qilish yetarli darajada yo'lga qo'yilmaganligi mamlakat aholisini turli e'tirozlariga sabab bo'lmoqda. Jumladan, Yuksalish umummilliy harakati raisi va Oliy Majlis deputati Bobur Bekmurodov yo'llarga o'rnatilgan kuzatuv kameralari va jarimalar yuzasidan o'z murojaatini e'lon qilib, unda kameralardagi kamchiliklar va "noinsof" tadbirkorlar ustidan arz qilgan<sup>14</sup>.

Mamlakatda shu kabi e'tirozlarni oldini olish maqsadida O'zbekiston Respublikasi Prezident Sh.Mirziyoev tashabbusi bilan 2021 yil 16 iyunda "Davlat organlari va tashkilotlarining faoliyati ochiqligini ta'minlash, shuningdek, jamoatchilik nazoratini samarali amalga oshirishga doir qo'shimcha chora-tadbirlar to'g'risida"gi Farmoni<sup>15</sup> qabul qilindi. Mazkur farmonga asosida mamlakatda maxsus avtomatlashtirilgan foto va video qayd etish dasturiy-texnik vositalari o'rnatilgan aniq manzillar, individual tartibda har bir dasturiy-texnik vositasi qayd etadigan yo'l harakati qoidalarini buzilishi to'g'risidagi ma'lumotlarni ham ochiq e'lon qilish tartibi belgilangan.

Jumladan, O'zbekiston Respublikasining Korrupsiyaga qarshi kurashish agentligi tomonidan shu kabi normalarni ijrosini nazorat qilish shuningdek, respublika hududida ishga tushirilgan onlayn rejimida ishlovchi fotoradarlar va intellektual rejimida ishlovchi kameralar to'g'risidagi ma'lumotlar monitoring asosida o'rganilganda, 2023 yilda<sup>16</sup> respublika bo'yicha onlayn rejimda ishlovchi 746 fotoradar va intellektual rejimida ishlovchi kameralar ishga tushirilgan. Ularning 23 tasi yo'l harakati qoidalariga rioya etilishini nazorat qiluvchi, 723 tasi ruxsat etilgan harakatlanish tezligiga hamda yo'l harakati qoidalariga rioya etilishini nazorat qilishga mo'ljallangan statsionar radarlarni tashkil etgan.


---

<sup>13</sup>Ўзбекистон Республикаси Миллий қонунчилик базаси // <https://lex.uz/docs/4096189#4102388>

<sup>14</sup>Бекмуродов Б. "Юксалиш ҳаракати раиси видеокўзатув камераларидаги камчиликлар юзасидан мурожаати" номли мақола // <https://bugun.uz/juksalish-arakati-raisi-videokuzatuv-kameralari-dagi-kamchiliklar-juzasidan-murozhaat-j-ladi?ysclid=lxivqfjgos989443384>

<sup>15</sup>Ўзбекистон Республикаси Миллий қонунчилик базаси // <https://lex.uz/docs/5459107>

<sup>16</sup>[https://uza.uz/posts/ozbekistonda-nechta-fotoradar-va-intellektual-kuzatuv-kameralari-bor\\_506016?q=%2Fposts%2Fozbekistonda-nechta-fotoradar-va-intellektual-kuzatuv-kameralari-bor\\_506016](https://uza.uz/posts/ozbekistonda-nechta-fotoradar-va-intellektual-kuzatuv-kameralari-bor_506016?q=%2Fposts%2Fozbekistonda-nechta-fotoradar-va-intellektual-kuzatuv-kameralari-bor_506016)



Mazkur foto va intellektual rejimda ishlovchi kameralar hududlar kesimida tahlil qilinganda, eng yuqori ko'rsatkich Toshkent shahriga (182 ta) to'g'ri kelmoqda. Mamlakatda olib borilayotgan shu kabi islohotlarga samaradorligiga qaramasdan, birgina 2023 yilning olti oyi davomida Toshkent shahrining o'zida 558 ta YTH sodir bo'lgan.

Bundan tashqari, yangi O'zbekistonda ta'lim tizimiga ham xususiy sektorni jalb etilishi bugungi kunda ayrim ko'rinishdagi nizoli holatlarni keltirib chiqarishga sabab bo'lmoqda. Xususan, "Kun.uz"ga Toshkentdagi Central Asian University (avvalgi Akfa) universiteti talabalarining ota-onalaridan shikoyatlar kelib tushgan. Mazkur shikoyat mazmuniga ko'ra, Central Asian University (avvalgi Akfa) universiteti bilan talabalarining ota-onalari o'rtasida tuzilgan shartnomaga ko'ra maktabning bitiruvchi sinfida o'qib turgan o'quvchilar bir vaqtning o'zida "Part-time" dasturi doirasida "Akfa" universitetining 1-kursini o'qib tugatishi va maktabni bitirishi bilanoq universitetning 2-kursiga qabul qilinishi belgilangan. Ammo, 2022-2023-o'quv yilida mazkur dasturda o'qigan talabalar yangi o'quv yilida universitetning 2-kursiga qabul qilinmasligi va 1-kursni qaytadan o'qishlari lozimligi aytilgan. Shundan so'ng, ma'muriyat va talabalarning ota-onalari o'rtasida nizo kelib chiqqan. Part-time dasturini tamomlab, bu yil 2-kursda o'qishni boshlashi kerak bo'lgan talabalar darslarga qo'yilmagan. Ular bir o'quv yili uchun 40 mln so'm kontrakt to'lagan<sup>17</sup>.

O'zbekiston Respublikasi Bosh prokuratura huzuridagi IJQK departamenti Mirzo Ulug'bek tuman bo'limi tomonidan olib borilgan tergovga qadar tekshiruv hujjatlariga ko'ra, bundan ikki yil avval "Akfa" universitetining sobiq rektori 1990 yilda Toshkent shahrida tug'ilgan "Bekzod Djalilov" tomonidan "Study for the success" MChJni Universitet ta'rischisidan yashirin holda, firibgarlik yo'li bilan o'ziga qo'shimcha mablag' ishlash maqsadida jalb qilgan, amaldagi qonunlarga xilof yo'l bilan ushbu MChJ nomidan ota-onalar bilan shartnomalar tuzgan. Shartnomaga muvofiq ota-onalarga ularning farzandlari maktabning 10-11 sinflarida o'qish bilan bir vaqtning o'zida "Akfa" universitetining 1-kursini o'qib tugatishi va maktabni bitirishi bilanoq Universitetning 2-kursiga qabul qilinishi MChJ tomonidan va'da qilingan va ota-onalar ushbu xizmat evaziga MChJ hisob raqamiga muayyan to'lovlarni qilishgan.

Mazkur holat bo'yicha, O'zbekiston Respublikasi Bosh prokuratura huzuridagi IJQK departamenti Mirzo Ulug'bek tuman bo'limi tomonidan "Au Financial Investment Team" MChJning sobiq

<sup>17</sup><https://kun.uz/kr/news/2023/09/25/akfa-universiteti-central-asian-universityda-janjal-sobiq-va-amaldagi-rahbariyatning-kelishmovchiligi-talabalarga-qimmatga-tushmoqda?ysclid=lxiy58han0320146789>

mansabdor shaxslari va “Cyber Genesis Systems” MChJ mansabdor shaxslariga nisbatan jinoyat ishi qo‘zg‘atilgan.

Yuqorida davlat-xususiy sheriklik asosida davlatning “yo‘l harakati xavfsizligi” va “ta‘lim” sohalariga funksiyalarni ijrosini ta‘minlashda yuzaga kelayotgan solbiy holatlar va normalar o‘rtasidagi ziddiyatlarni ilmiy jihatdan tahlil qilish asosida, davlat-xususiy sheriklik faoliyatini takomillashtirish yuzasidan quyidagi taklif va tavsiyalar ilgari suriladi. Bularga:

birinchidan, davlat organlarining tegishli funksiyalarini xususiy sheriklik asosida amalga oshiruvchi yuridik shaxslar o‘rtasida elektron auksion o‘tkazish tartibini belgilash;

ikkinchidan, davlat-xususiy sheriklik asosida faoliyat ko‘rsatuvchi yuridik tashkilotlar hisobotini yilda bir marotaba monitoring asosida o‘rganish hamda faoliyat qoniqarsiz deb topilganda shartnomani bir tarafdin bekor qilish;

uchinchidan, xususiy sektorlar faoliyatini tahlil qilish va rivojlantirish boshqarmasini zarur nazariy bilim va amaliy ko‘nikmalarga ega yuqori malakali kadrlar bilan to‘ldirish;

to‘rtinchidan, xususiy sektorlar faoliyatini tahlil qilish va rivojlantirish boshqarmasi xodimlarini malakasini oshirish uchun ularni rivojlangan davlatlarga qisqa muddatli o‘quv kurslariga yuborish tartibini joriy etish.